



# Tir Yimym

www.tiryimym.in

Regd. No. RNI. NAGAAO/2004/13113. Postal-NE/RN-717.

e-mail : tiryimym@gmail.com

TAPAK 7

Yangia anidakangma :

f Tir Yimym

ig tiryimym@aolima

yt tir yimym

TAPAK 8

Biden-i Xi Jinping dang  
'dictator' aja, China mepelar

Venus Williams nem Wimbledon  
atema wildcard agütsü



VOL. XX NO. 249 (ADOK 249) DIMAPUR YANGTEPNÜ (THURSDAY)

AAMI (JUNE) 22, 2023

₹ 5.00

## CANSSEA-i itasen aser CMHIS indang khuret lemsatop

**Dimapur, June 21, 2023 (TYO):** Confederation of All Nagaland State Services Employees Association (CANSSEA)-i Bodbarnü Chief Secretary, J. Alam aser Finance Commissioner & Additional Chief Secretary, Sentiyanger Imchen na den ajurutepa khuret aika lemsatopogo.

Iba mapang CANSSEA-i tena nem state sorkar mapa inyaktermi khuret balala ajuruba indang tezüluba nung agütsü, ta Press and Information Secretary-i sangdong ka nung ashi.

Iba mapang CANSSEA ketdangpurtemi state sorkar mapa inyaktermi mapang shitak nung itasen manguba, Dearness Allowance metutsüba aser Chief Minister's Health Insurance

Scheme (CMHIS) onüktem benoka lemsatop.

Nagaland ya non revenue earning state ka lir aser iba jagi central grant ajanga dang sorkar mapa inyaktermi indang itasen agütsür ta Chief Secretary aser Finance Commissioner & Additional Chief Secretary nati ashi.

Centre sorkari agütsüli itasen agütsüsü merangtsü aser kobi melii Dearness Allowance tutsüsü ta Finance Commissioner-i ashi.

CMHIS onük meyipa repringshitsü saka universal health insurance ya scheme tasen ka asünung sorkar mapa inyaktermi aremzüka atatsü mepishir, ta FC Sentiyanger Imchen-isa metetdaksü.

## Mumbai nung Naga tsür ka soseter lia angu

**Mumbai, June 21, 2023 (Agencies):** June 17, 2023 nü Mumbai nung film industry nung makeup artist ka indang tasü mang angu.

Iba nisung ya arishi küm 26 tain Sara Yanthan ta jangjaogo aser la ya Mumbai kübok Khar Danda nung para ki ka nung lia aru.

La ya ceiling fan nung soseter liasü saka lar kinungertemi la ya tepsetba asütsü akok ta temulung melemba metetdaksüogo kechiyong la temang nung zübotem keta liasü.

Sara ya Nagaland nungi liasü aser la ya Mumbai nung films, television aser web series nung makeup artist ka ama inyaka aru.

Deobarnep nungi lai phone magizüki aküm. Hombarnü la aliba ki kiburi la dang ki para meshitsü atema lar kidangi ao saka la nungi telangzüba kecha maliba agi pai police nem osang sangoktsü.

Iba osang angashir Khar police oa Sara'er ki kakpoka atundang la mejangba takdang indang ceiling fan nungi la soseta aliba angu. Iba

mapang la indang takdang nung azü aika yimshia liasü aser la teka anatsülen zübo keta aliba police-i angu.

Khar Police aser Crime Branch ajanga iba tatalokba bushisügangdang südar. Nisung kari la tepset asütsü akok ta police-i temulung melemba bilemba shiogo.

Khar police-i Nagaland nung Sara tetsü Rosie den tongtepratep aser la Mongulbarnü Mumbai tonga aru.

Mongulbarnü Khar police-i Cooper Hospital nung postmortem agi aser mangji tetsü ket nung agütsü.

La ya Reserve Bank nung inyaker ka den meimtepa aru aser pai la dang kibong akümtsü rongshir ta lar jalai ashiba osang ka tetsüi metetdaksü.

"Sara indang taktang nung azü aika yimshia liasü. La ya nisung kari tepset aser aleneta yutsü ama temulung malemer. Anungji police-i bushisügangdang asütsüla aser ozü jala nem temeten agütsütsüla" ta tetsüisa ashi.

## Changtongya-Longleng lenmang lapokogo

**Dimapur, June 21, 2023 (TYO):** NH-702 nung anentsüh aluba tera endokogo aser iba jagi gari tilatem Changtongya-Longleng road ajanga senzüsü melago.

June 21, 2023 nungi anepdang 6:00 ako nungi nikongdang 6:00 ako tashi Light Motor Vehicles (LMV) senzüsü melar saka tsüngsang majungdang kanga kümdangtsü metetdaksüogo.

Anentsüh alua aliba tesemtem aser temeket nung gari manentsüla ta ketdangsurtemi

ashi. Tanga tetuyuba ka magütsü tashi Longleng-Changtongya road nung gari tulutem mesenzüi atatsü atema ketdangsurtemi metetdaksüogo.

June 19, 2023 anepdang 9:00 ako meta Changtongya-Longleng lenmang nung anentsüh tulu ka alua lenmang shibanga liasü.

Toba Bodbarnü kasa lenmang nung tesem ana nung anentsüh alu saka item lendong balala nung nisung yiruyibongba osang kecha mali.

## ODOP programme ajanga Nagaland rongsenketzung renloktsü

**Dimapur, June 21, 2023 (TYO):** One District One Product (ODOP) programme kübok ajungketba products ajanga Nagaland state rongsenketzung ajungkettsü ta Sumita Dawra, IAS-i ashi.

Sumita ya Department for Promotion of Industry & Internal Trade Government of India nung Special Secretary inyaker aser yashi 'Vibrant Nagaland' sentong nung jembidang lai iba olen ashi.

Iba sentong ya Department for Promotion of Industry & Internal Trade (DPIIT) den Department of Industries & Commerce, Nagaland ajanga ayongzük.

ODOP ajanga linük kübok district balala nung products meyirjang aika agizükogo. Linük nung district shiai langka ka agütsüteter aser item ya shishilembaba ajanga senotsü angur aser rongsenketzung renloker, ta Sumita-i ashi.

"ODOP kübok products aika international market tongogo aser Nagaland nung shishilembatsü aika lir. Iba ya Nagaland nungi jiro aser ninang mojitzü sempettem anguba ajanga ni shiteter" ta laisa metetdaksü.

"Dubai-i India nungi saffron, rice aser honey bener aoer aser parnoki süngjanglijang tajungtem bener onür. Nagaland nung pineapples, kiwi, coffee, turmeric, ginger aser king chili kanga tsünüteter anungji startups ajanga kanga junga shishilembatetsü" ta Special Secretary Sumita-isa ashi.

Nagaland nung One District One Product (ODOP) items ya Horti-Agri produces nung rangloker inyaker, ta Nagaland Development Commissioner, R. Ramakrishnan-i ashi.

Naga King Chilli ya Nagaland nungi product balala lir aser iba atema Peren district shimteta lir. Ajisüaka, Phek district atema Kiwi shimteta lir saka iba kasa ya linük kübok district 5 nunga shimteta lir, ta pai ashi.

Iba mesükji Wokha atema fisheries shimteta lir saka iba ya tanga districts 11 den kasa lir aser Chumukedima atema pineapple shimteta aliba ya tanga district 18 den kasa lir, ta Ramakrishnan-i ashi.

Nagaland indang Horti-Agri produce asoshi organic certification kanga tongtipang asütsü aser GI tagging asüba ajanga shishilembaba nung tajangzük angutsü ta pai ashi.

Tang tashi nung Nagaland nungi GI Tagged asüba chiyungtsü asemilir aser itemji Naga King Chilli, Tree Tomato aser Sweet Cucumber lir, ta paisa ashi.

Iba sentong nung Industries & Commerce Commissioner & Secretary Kekhrievor Kevichusa-i "Nagaland nung district ajak atema ODOP products shimteto aser district 10 nungbo secondary product dena shima lir" ta ashi.

Sl. No	DISTRICT	Name of Product	Primary	Secondary Product/Products
1	Dimapur	1. Pineapple		2. Bamboo
2	Kohima	1. Pickle		2. Chilli
3	Mokokchung	1. Coffee		2. Tea 3. Banana 4. Ginger
4	Mon	1. Large Cardamon		2. Tea 3. Bamboo 4. Handicraft
5	Phek	1. Kiwi		2. Wood/Bamboo
6	Tuensang	1. Kholar (Rajma)		3. Anthurium
7	Wokha	1. Fish		2. Ginger 3. Passion fruit
8	Zunheboto	1. Soya bean		
9	Peren	1. Naga king chilli		2. Handicraft
10	Kiphire	1. Kholar (Rajma)		
11	Longleng	1. Ginger		
12	Noklak	1. Millet		2. Ginger 3. Handicraft
13	Chumukedima	1. Pineapple		
14	Niuland	1. Banana		2. Yam 3. Rubber
15	Shamator	1. Kholar (Rajma/Kidney beans)		
16	Tseminyu	1. Turmeric		

## Kohima nung World Motorcycle Day among



**Kohima, June 21, 2023 (TYO):** Bodbarnü Kohima Police-i K K Motors (Royal Enfield) aser Nagaland Motorcycle Club (NMC) Kohima Chapter den yaritepa World Motorcycle Day mongogo.

Tanü NMC aser Kohima Police nungi motorcycle anirtem SP Office Kohima nung adenshi. Idak nung jagi parnoki 'motorcycle rally for road safety' sentong agia PHQ Junction tashi ao aser Main town-D. Block-High School junction ajanga NPSC office kima nung tembang.

Iba mapang parnoki 'Know How for two wheelers' indang pamphlets alem.

Iba anogomong nung NMC Kohima Chapter züngsemtemi SP Kohima Imnalensa nem parnok indang modified exhausts/silencers agütsü.

"Iba anogomong ajanga lenmang nung two-wheelers aser gari anirtemi traffic rules meteta alitsü aser lane driving sülen anidaksü osang prokshir" ta SP Imnalensa-i ashi.

"Iba anogo ajanga modified exhaust aser silencers anema campaign tenzüker kechiyong item ola ajanga meinpronger aser

Motor Vehicle Act ajanga 80 decibel tema noise pollution asütsü memelar" ta pai ashi.

"Anogoshi ama motorcycle tsükokba lendong ataloker anungji two-wheeler anirtemi kanga kümdanga anishitsüla aser asenoki motorbike anishiba indang safety measures osang prokshidi" ta Imnalensa-isa metetdaksü.

Iba sentong nung mendenji Deputy SP (Traffic) T. Henthai Phom liasü aser K K Motors General Manager Sapulu Krocha o NMC Kohima Chapter züngsem Khriebu Nakhro nati o tatsüsü jembia liasü.

# Ali telung nung tzu wazuka ayutsu training tenzükogo



Kohima nung June 20, 2023 nü ali telung nung tzu wazuka ayutsu training agütsüdag tangokba noksa ka nung tongtipang nisungtem aser training nung adenertem angur.

**Kohima, Aami/June 21 (TYO):** Ali telung nung tzu (groundwater) kumzuka ayutsu aser kumdanga amshitsü asoshi anogo asem training ka Office of Chief Engineer, Public Health Engineering Department (PHED), Kohima nung tanü tenzükogo.

Iba sentong ya Ministry of Jal Shakti, Department of Water Resources, RD & GR aser Central Ground Water Board, North Eastern Region, Guwahati ajanga sponsor asü.

Jal Jeevan Mission-Har Ghar Jal ya Department of Drinking Water and Sanitation, Ministry of Jal Shakti, Govt. of India ajanga inyaker aser India nung kilen shia nung tajemtsü tzu tajung agütsütsü nükjidong lir.

Ajisüaka ali telung nung tzu wazuka ayutsu, talisa long temera aliba tesem nung timtem balala ajurur.

Ali telung nung tzu bendenba aquifer systems ya tzu aruba lenmang mesamadaktsüi tesatamba aser tajungba kumdaktsütsü nungdaker.

Ministry of Jal Shakti indang SoPs sülen anidaka CGWB, NER Guwahati ajanga PHED Nagaland nung engineer tem nem 'source sustainability' training agütsür.

Iba training tenzükba sentong nung tongti tesemdanger Er. Vikeduoлие Mepfhuo, Superintendent Engineer, Kohima Circle, PHED liasü aser Er. Ichirang Zeliang, Executive Engineer Sanitation and WSSO, PHED tetushi tejaoker liasü.

Iba sentong nung menden Anenuo Pienyu, Scientist- C, CGWB liasü aser Shashinlo Kent, Scientist-C, CGWB ajanga melepzüing o jembia liasü.

Mezüing session nung Arijit Mitra, Scientist C, CGWB ajanga

hydrogeology aser aquifer system indang onük nung jembia liasü.

Iba sülen Shashinlo Kent, Scientist C, CGWB ajanga Nagaland nung hydrogeology indang presentation ka tzipokdak rangloker agüja liasü.

Aneinuo Pienyii, Scientist-C, CGWB ajanga 'SoP of source sustainability of groundwater sources and risk assessment' onük nung jembia liasü.

Kasa sentong nung Jal Jeevan Mission kübok 'water gap assessment' aser 'risk assessment of village' indang mapa agi inyaka sayua liasü.

Maneni 'toposheet reading and demarcation of watershed boundary' indang hand on session Chao Kongseng Gogoim, Scientist- C lenisüba kübok agi.

Iba training ya June 22, 2023 tashi agitsü.

# State nung International Yoga Day amung

**Dimapur, Aami/June 21 (TYO):** Alima ajanga den külemi Nagaland nunga Indira Gandhi Stadium, Kohima nung June 21, 2023 nü 9 buba International Yoga Day munga liasü, kong Nagaland Governor La Ganesani iba sentong moaja liasü.

Iba sentong ya Department of Youth Resources and Sports ajanga AYUSH Mission aser Health and Family Welfare, Government of Nagaland den lungjemer ayongzuka liasü.

Iba sentong nung Governor-i o tatsüka jembidang state sorkari International Yoga Day nung iba ama sentong tajung ayongzükba asoshi pelaba lemsatepa liasü.

Yoga nungya temang atsüshiba kisüing masü saka tango sashiba yimya aser tekolok asendenshiba dena lir, ta Governor-i ashi.

Anungji ajaki temang aser tekolok anema alitsü atema Yoga yimyatam amshitsüla, ta pai ajungshia liasü.

Paisa International Yoga Day indang nükjidong rateta ashi, koba Ato Kilonser Narendra Modi-i 2014 küm UN HQ nung benoka liasü.

Yoga sentong nung Governor den Raj Bhavan nungi ketdangsurtem; Commissioner & Secretary YRS, Wezope Kenye; Deputy Commissioner Kohima, Shanavas C; Secretary, YRS, Anthony Ngully; Director,

YRS, Kethosituo Sekhose; AYUSH Mission nungi ketdangsurtem, H&FW, NCS (Probationers), NCC, NSS, IG students aser Patkai College nungi kaketshir desema kakets reju balala nungi kaketshirtem dena liasü.

Iba sentong ya SPO AYUSH, Dr. Seyiekhrietuo John-i anir agia liasü.

Linük ajanga den külemi Central Bureau of Communication Field Office Kohima aser Kendriya Vidyalaya Kohima lungjemer KV School Kohima nung June 21, 2023 nü 9 buba International Yoga Day munga liasü.

Iba sentong nung tongti tesemdanger ka ama jembidang Manish Kumar Sachar, DIG CRPF, Kohima ajanga Yoga ya takum nung yimya ka lir ta ashi.

Asentzü sena asen anibelega temang arakzüba ya Yoga ta shitetsü, ta pai ashi aser kaketshirtem dang anogoshi libaliru nung saisapong aser temang arakzüba mapa inyaktüsü ayongzuka liasü.

Yoga, saisapong aser temang arakzüba mapa inyakba ajanga 'stamina' yanger, tashi itdaktsür aser junga mejangdaktsür, ta pai ashi.

Iba sentong nung Abhishik TGT (P&HE), KV Kohima ajanga Yoga Asanas sayu aser Yoga indang Quiz tetoktepba agia liasü.

Iba tetoktepba nung Class 9 nungi Rahul Kumar-i mezüingbuba jenjang angu, Class 9 nungi Samarth Rathore-i tanabuba jenjang aser Class 10 nungi Kesho Kent-i tasembuba jenjang nguteta liasü.

Mokokchung district kübok Rajeshwari Karuna School, Tuli nung Central Bureau of Communication FO Tuensang ajanga Yoga Day ayongzuka liasü.

Iba sentong nung shisalen sayur Yajang High School nungi tesayur Among Aier liasü aser Yoga yimyatam sayuba nung shisalen sayur Lakshyajit Das, Yoga Teacher liasü.

Iba anogomung nungtem nung Quiz tetoktepba aser Yoga demonstration sayua liasü.

National Ayush Mission, DHFW Kohima-i "Yoga for Harmony & Peace" omen nung ajemdaker June 21, 2023 nü Community Hall, Tzudikong Town, Mokokchung nung International Yoga Day munga liasü.

Iba sentong nung Lt. Col. Ravinder Kumar aser pa indang Sergeant, Tzudikong Ad-HOC Vice chairman aser committee züingsemtem, kaketshirtem, AHWC Tzudikong nungi staff tem, AWWs tem dena liasü.

Iba sentong nung Yoga sayur ya AHWC Chuchuyimpang nungi Aosenla aser Meren liasü.

# Dimapur nung Job Fair alitsü

**Dimapur, Aami/June 21 (TYO):** District Employment Officer Dimapur, Gideon L Sumi ajanga sangdong ka nung ashiba agi, District Employment Exchange, Dimapur, National Career Services Centre for SC/ST Kohima aser National Career Services Centre (differently-abled) Dimapur lungjemer June 22, 2023 anepdang 9:00 ako nungi nikongdang 4:00 ako tashi Job

Fair ayongzüktsü. Iba sentong ya District Employment Exchange Office Building, Zion Hospital Road, Purana Bazaar Dimapur nung ayongzüktsü aser iba dak sendakba osang tejangja metettsü atema mobile number 9862922866/7005619124 nung jembitettsü mesüra employmentdimapur@gmail.com nung reprangtettsü, ta sangdong ajangasa ashi.

# BMSCH Kohima 2 buba ken tentepba sentong agiogo

**Kohima, Aami/June 21 (TYO):** Bright Morning Star Children Home (BMSCH) Kohima ajanga küm nung khen ayongzükba 2 buba Annual Singing Competition sentong World Music Day den külemi June 21, 2023 nü ayongzuka liasü.

Iba tetoktepba nung Seniors category nung takok angur mezüingbuba Akhonuo Pfüsenuo, tanabuba Rüduolhounuo aser tasembuba Haiühyangyola liasü. Consolation angur ana, Nyimangmongsen aser Kenrungle liasü.

Junior category nung Chusika Pfithu, Ngomi Fasha aser Dolengsangla nungeri mezüingbuba, tanabuba aser tasembuba jenjang nguteta liasü. Iba category nung consolation angur Maria aser Pirasu liasü.

Takok angrutem nem senpet telesa mezüingbuba nem sen 10,000, tanabuba nem sen 5000 aser tasembuba nem sen 3000 den kulizüing kakets den Soren

Kikon, Naro Mepfuo, Apele T Wotsa, Inoto Arkha aser Akshay Joshi nungeri sempet talep agüja liasü.

Iba tetoktepba nung tetendanger tem ya Abi Angami, Founder/ President, Ideal\_IW Charitable Society aser Pezet Newme, Music teacher aser kentener liasü.

Iba tetoktepba nung takok angur nem Alenuo, Superintendent Bright Morning Star Children Home ajanga sempet ya agüja liasü.

Lai kaketshirtem dang maneni ken atentsü ajungshi aser ajak kentener mekumtetaka pei ola ajanga Tsüngrem sentsüwangshitsü asoshi ken tentettsü, ta ashi.

Lai sempet agütsürtem aser iba Charitable Society amenoker yaria arurtem dang pelaba lemsatepa liasü.

Ken ajanga nüburtem ka kuma lungjemdaktsür aser ken ajanga BMSCH ya alima nung nüburtem den sendakteptsü maongka angur, ta lai ashi.

# Longchem Adhoc Town Committee-i pelaba lemsateper

**Dimapur, Aami/June 21 (TYO):** Minister, Tourism & Higher Education, Temjen Imna Along ajanga Primary Health Centre, Longchem asoshi X-Ray Machine den CR System bener arutsüba atema Longchem jila nung aliba nüburtem tenüing nung pelaba lemsateper, ta Longchem Adhoc Town Committee vice chairman, A. Chuba Longkumer ajanga sangdong ka nung ashi.

Centre aser State nung Ministry of Tribal Affairs nung ketdangsur ajak dang Committee ajanga pelaba lemsateper. Item machine amenokba ajanga Japukong Range nung nüburtem kanga ajangzüktsü, ta sangdong ajanga ashi.

Nüburtem anitsü asoshi Tsüngremi ozü lenir nem maneni shisatsü tajung aser anema aliba moajangma, ta sangdong ajangasa ashi.

# Akashvani Kohima-i Refresher Course training agütsü

**Dimapur, Aami/June 21 (TYO):** Akashvani Kohima ajanga June 21, 2023 nü Conference Hall, Red Cross Complex Kohima nung tetsü oshi nung osang azüngertem (Dialect News Presenters) nem Refresher Course training sentong ka ayongzuka agüja liasü.

yimtsüingtem nungi osang aser sentong balala angar aika lir.

Parnokisa osang nung temolung agütsütsü, sentong zünga ashiba yimyatam aser radio sentong temaba jenjangi ajungkettsü asoshi 'presenter' temi meranga inyaktüsü indang jembia liasü.

Training nung shilem agirtem dang programme balala yanglutsü ajungshia liasü. Iba mapang Akashvani Kohima nung sentong balala nung temolung agütsütsü, Broadcasting nung inyaktüsü aser meinyaktüsü, inyakyim aser yimya balala, Akashvani osang, osang azüingba, commercial aser social media onüktem awajema liasü.

Osang azüngertem nem sentong balala indang tali metetdaktsütsü aser parnoki tayongzükba balala ajurudang, talisa July 1, 2023 nungi tenzüktsü aliba programme contents tem loktepba aser 'origination of a single channels' inyakyim angazükdakja liasü.

Iba training nung shisalen sayur Akashvani Kohima nungi ketdangsurtemi osang ola agitepba kanga tongtipang lir ta ashi, kechiaser yimdkak

Iba sentong nung adener temi shisalen sayurtem den sensaksemba mapang agia liasü.



DDSC Stadium nung Patanjali Yoga Women Wing ajanga Bodhbarnü International Yoga Day amungdang tangokba noksa ka nung Advisor, Prisons, Printing & Stationary, Er. Kropol Vitsu angur.



June 21, 2023 nü International Day of Yoga anogomong nung AIIMS, New Delhi nung Health and Family Welfare Union Minister, Mansukh Mandaviya leniba nung tangartemi yoga aidang tangokba noksa nung angur.

### Opposition-i Delhi ordinance atema tama jembitsüla: Kejriwal

**New Delhi, Aami/June 21 (Agencies):** June 23, 2023 nü Bihar yimtiba, Patna nung opposition party balala nungi lenirtem senden amentsü lia Aam Aadmi Party (AAP) tongti aser Delhi Chief Minister Arvind Kejriwal-i shidi ajanga opposition lenirtem dang opposition telongjem senden nungji Delhi ordinance mezüng süoka jembitsü mepishiogo.

Kejriwal-isa opposition party tem dang opposition senden nungji Delhi ordinance dak sendakba nung peipei party tangatetba tejanga metetdaksütsüla, ta mepishi.

Kejriwal-i opposition lenirtem dang, iba ya Delhi kija indang tebilemsü onük ka dang masü saka ajak atema tebilemsü onük ka ama züngshidaksüner, ta metetdaksü.

Parliament nung iba Bill ya agizükra BJP-i yimsü masüba state tem nunga iba ama bill benoktsüa akok, aser ibaji ajanga state sorkartem indang tashi nung amoshitsü, ta pai ashi.

Hokolbarnü ayongzükba opposition sendenji Bihar Chief

Minister aser Janata Dal (United) lenir, Nitish Kumar-i ayongzük. 2024 küm Lok Sabha election nung BJP anema tokteptsü atema asalentong yanglutsü nukjidorong nung iba senden ya ayongzük.

Opposition party balala dangi züluba shidi nungji Kejriwal-i yamai shia lir, tanga state tem nunga ka khen ka khen ta democracy agientsü aser Ato kilonseri Governor aser Lieutenant Governor office ajanga state ajak yimsütsü.

Paisa, "Ni iba (ordinance) ya kanga junga asadangogo. Delhi ya state tesadang dang asüba agi Delhi nung ang iba ozüng benoktsü akok, ta jembitsüji tai. Iba ama mezüka ozüng ajanga Centre sorkari state temeden agientsü. Tatishitsü agi, item ama ozüng ajanga Centre sorkari state sorkartem tashi kübok aliba electricity, education, shishilembaba aser tanga onüktem agientsüa akok," ta metetdaksü.

"Centre sorkari iba ama tetuyuba ajanga Delhi nung tetendangba agir. Centre sorkari iba tetendangba nung

takok ngura BJP sorkar maliba state tem nung ka khen, ka khen ta concurrent list nung aliba state tem tashi agientsü. Anungji iba ama ozüng ya Parliament nung khenyongi magizükdaksütsü atema party ajaki aser nija ajaki longjemmer inyaksüji kanga tongtibang," ta pai shidi nung shia lir.

Arvind Kejriwal-isa, iba ordinance ya Bill ka ama Parliament nung benokra opposition party tem longjemmer tamakok ngudaksütsüla, ta ashi.

"Iba Bill ya Parliament nung agizükra ibaji Delhi nung democracy tetembanger asütsü. Joko Delhi nung alirtemi peii aginüba sorkar shimtsü atema tashi malitsü. Centre sorkari Lieutenant Governor ajanga Delhi indangindanga yimsütsü. Nüburtemi kechi party sorkar shimdir shimaka parnok dak tashi malitsü. Delhi sülen tanga state ajak nung democracy agientsü, aser tatemsa Ato kilonseri Governors aser LG ajanga state ajak yimsütsü," ta paisa metetdaksü.

### Linük nung Hindu-Muslim tesendaktepraksatsütsü meranger: Mehbooba

**Srinagar, June 21 (Agencies):** Bodhbarnü PDP Tir aser taoba mapang Jammu & Kashmir Chief Minister, Mehbooba Mufti-i party nung inyakertem dang taruba Amarnath Yatra nung temeshi ainlen senzürtem tajungtiba nung tenzütsü mepishi.

"Temeshi ainlen senzürtemji

(Hindu) asen ainertem lir, parnok tajungtiba nung anepalutsüla, kechiyong ibaji asenoki (Kashmiri) inyaka aruba sobaliba lir," ta lai ashi.

Laisa, linük tesem ajaklen Hindu-Muslim tesendaktepraksatsütsü aser telemsa adokdaksütsü meranger, ajisüaka Kashmir-ibo mapang

ajak nung linük nung nübur ajak adianu temeimtep nung alitsü ajungshir, ta metetdaksü.

"Ni ozü party nung inyaker ajak dang iba 'yatra' ya takok ngudaksütsü ayongzük. Temeshi ainlen senzürtem pelaa agizükang aser akokba lenmang balala agi yariang," ta lai ayongzük.

### State 10 nung tzunglu kanga arutsü: IMD


**New Delhi, June 21 (Agencies):** India Meteorological Department (IMD)-i state 10- Arunachal Pradesh, Nagaland, Manipur, Mizoram, Tripura, Gangetic West Bengal, Bihar, Jharkhand, Odisha aser Andhra Pradesh nung tzunglu sashia arutsü, ta metetdaksü.

IMD-i, Sub-Himalayan West Bengal aser Sikkim tesem kar nung tzungu sashia arutsü aser Assam o Meghalaya na nunga tesem kar nung tzunglu sashia arutsüa akok, ta metetdaksü.

"Arunachal Pradesh, Nagaland, Manipur, Mizoram,

Tripura, Gangetic West Bengal, Bihar, Jharkhand, Odisha aser coastal Andhra Pradesh tesem kar nung tzunglu kanga sashia arutsü. Uttarakhand, Odisha aser Chhattisgarh tesem kar nungbo tsüngerperet den tzunglu sashia arutsü aser mopung ghonda ka nung kilometer 40-50 tashi kera aontsü," ta IMD-i metetdaksü.

IMD-isa, June 22 nü Assam, Meghalaya, Gangetic West Bengal, Bihar, Jharkhand, Odisha, East Madhya Pradesh aser Coastal Andhra Pradesh tesem kar nung tzunglu kanga sashia arutsü, ta metetdaksü.



June 21, 2023 nü New York nung India Ato kilonser, Narendra Modi-i Tesla & SpaceX CEO, Elon Musk ajurudang tangokba noksa nung angur.

### Calcutta HC-i Bengal SEC dang Central sepai 82,000 meshitsü tuyu

**Kolkata, June 21 (Agencies):** Bodhbarnü Calcutta high court-i West Bengal State Election Commission (SEC) dang state nung Panchayat elections atema ghonda 24 tsüngda central sepai 82,000 dak tema meshizütsü tuyuogo.

Chief Justice, TS Sivagnanam leniba nung division bench kati, 2013 küm state nung panchayat election mapang nung SEC-i Central sepai 82,000 meshia liasü, ta metetdaksü. SEC-i High Court dang, July 8 nü panchayat election atema tang tashi nung central sepai campany 6 meshia lir, ta metetdaksü.

2013 küm West Bengal nung district 17 dang liasü saka tangbo district 22 kümogo, iba dak alia tesüiba küm 10 tsüngda voters-a aika renlokogo, ta shia court-i SEC dang ghonda 24 tsüngda central sepai peria meshitsüla, ta tuyu.

Court-isa SEC dang, court-i tuyuba ama meinyakra tasüngdangba akatsü, ta metetdaksü.

Ajioda SEC counsel-i, court-i tuyuba ama Centre sorkar dang central sepai 82,000 ji tangsa yokang ta mepishitsü, ta metetdaksü.

West Bengal nung panchayat election atema nomination tenzüka anogo nungi tenzüka tanü tashi nung iba election dak sendakba nung nisung 9 tashi süogo.

CPI(M) nung inyaker kata injang agi yirua aliba treatment tagidak mapang Mongolbar aonung süogo, aser ibaji

densemabo tang tashi nung nisung 9 süogo.

CPI(M) züngsemji arrshi küm 23, Mansur Alam liasü, ta jangjaogo. June 15 nü North Dinajpur district nung injang amshia raradang pa kanga mejungi yiruba sülen hospital ka nung treatment tagidak lia Mongolbar aonung asü.

Iba election dak sendakba nung nisung teimtiba asübaji South 24 Parganas district kübok Bhangar nung liasü. Iba jila nung election nominations mapang nung nisung asem asü.

Bodhbarnü CPI(M) central committee züngsem, Sujan Chakraborty-i, election dak sendakba nung nisung aika asüba sülen-a state sorkar mesüra state election commission-i election timi agitsü atema central sepai security magütsüteter, ta aitsü.

Taoba hopta Murshidabad district kübok Nabagram nung Trinamool Congress local area secretary, Mohammell Haque tepset, South 24 Parganas district kübok Bhangar nung rara adokdang injang agi yirua All India Secular Front (AISF) nung züngsem, Selim Mollah asü.

Bhangar nungsa nomination file asü dang rara adoka AISF candidate ka aser Trinamool Congress nung inyaker ka na asü. North Dinajpur district nunga CPI(M) candidate ka nomination file asü aodang kaset. Panchayat election dak sendakba nung mezüng June 9 nü Murshidabad district kübok Khargram nung Congress party nung inyaker ka khaseta liasü.



June 21, 2023 nü International Day of Yoga anogomong nung Karwar, Karnataka nung Navy sepaitemi INS Vikramaditya rong nung yoga aidang tangokba noksa nung angur.



## TIR YIMYIM YIMOBILEM (EDITORIAL)

DIMAPUR YANGTEPNÜ, AAMI(JUNE) 22, 2023

### Nagaland nung medical azüngtsü

**T**aküm nungibo Nagaland nung medical doctor kümnerkem asoshi tazüngdak akatsüsa medical college tenzüker. Nagaland state kümer küm 60 buba nung anguba takok tulu aser tajung kaji ibai asütsü. Atangji, tanga kidanger state-tem den medemdangra, tang alima aso 21 buba tom kati ayaokdang pi joko nisungi masü saka Artificial Intelligence ajanga computeri dang kechisarina mapa ajak inyakba mapang asenok tangar bendanger teyari dena agia medical college ka, ajia hospital-bo maden, lapokbaji kanga tiaksanga jembitsüba o kabo masü. Ajisüaka, tangar tashi-temetetter, takar aser ochishirtem den asenok medemdangtsü makok, anungji asenoka asenok yari tang danga medical college tenzüktetba ya tanü aser asüng lanurtem asoshi temoatsü tuluka asütsü. Naga nunger jala jabasotem ya ajak tokolok techira aser sempet tajung aketba tanurtem dang lir, anungji parnok dak aketba sempet aser tashiji reprangteta government-i sensaker tanurtema züngtetsüsa Nagaland nung tazüngdak tapu balala lapoktsüra, Naga nunger tasor temang lokti, yimten aser arogo asoshi tagidak akaba senso kaka küma intettsü. Tanübo asen state government-i asen tanurtem medical aser engineering azüngtsübabo yutsür school azüngtsü asoshia government school-a peria melapoktsütetter. Iba jagi tsüraburtem aikati pei chirnurtem kaketrejui meyoktet taküm raksadaksür aser iba jagi lokti aser yimten nüken belemdaksür. Atangji, item tamakok aser timtem tia ya government nung alirtemia meteta lir, saka asenok inyakyim aser jakla yimya majungba nung onsara mejungika kümadok nungji, melenshinüyonga memelenshitetter. Joko, asenok ochimashiba tashidak ya cancer kümadok nungji asenokbo ojang saka asenok chirnur aser semchirsemnurtemi asenoki inyaksaba ajak ya metongshia Nagaland tasen küma tenzüksütsü imlar. Asenoki tang yanglu tenzükbaba Nagaland yabo yanglupetogo. Iba ama Nagaland nung alirtemi mapa agi mesayutetaka, temulungjang nungbo tajung kümnüba mapang ka nung Nagaland nunga Japan nunger teyari dena agia medical college lapoktetba ya Nagaland tajung aküm tenzüker südaktsüdima. Atangji, tangar teyari agia terenlok mapa inyakba ya jungla jungpet, kechiyong asenok kanga ochimashiba yagi asenokbo tangar sen amshia külemi mapa ka inyaksübbaji tarendaksüka bilemer. Ajisüaka, alima dang asenok sensakba memiimshitet, anungji teyari magiang asen lima nung asenok asoshi asenoki kecha meinyaktettsü. Iba tangatetba nung tangari asenok dak temulung malem metenzüksüsa asen inyakyim mapa ajak nung teindang shisatsü agi ochishia Naga nunger tenüng memenükdaksütsüsa inyaksüla. Tanü asenoki asenok dak tangari temulung lemtettsüsa inyakbaji asüng asen chirnurtem asoshi rongsen tulu rezüngtsür asütsü. Atangji, Nagaland nung Nagaland University lir, National Institute of Technology lir aser Engineering college-a lir. Ajisüaka, tangari züngshitsüsa masü. Item rejutem ajak ya state government nung alirtemi ajungshia tajungba küma asentenshidaksütsüla. Aji oda, Nagaland ya tangalen nungi kaketshisatsü tapu balala bushia Nagaland University nung, NIT nung, Engineering college aser tang lapokba Medical college nung raktepa arua azüngdak, shisa anetdak tesem ka asütsüsa asenok ajaki nendaka, meranga aser ochishia inyaksü merangdi. Taküm küm nungi Nagaland nung medical azüng tenzükbaba kaketshirtemji küm pezü pungo sülenbo medical doctor kümer, tangaria Nagaland Institute of Medical Sciences and Research (Nagaland Medical College) nung azüngertemsa tajungba ta shitettsüsa tetenzükdangyongi jungjunga tenzüksü imlar. Iba tangatetba aser temulungtetba nung Nagaland nung yimsüsür aser ketdangsertemi anir Nagaland Medical College agi Naga nunger ajak nümadangteta taneptsür tajung adokdak aser taneptsü angudak tesem tajung küma yangertettsüsa ochiba tenla agüja yariteptsü nungdaker.

## OLEMSABANG

### NÜNGJA ASER TETSÜR LIBALIRU

~ P.Renthy Jamir.

*(Yashi adok nungi...)*

Ni tejak nung powder tilaka nülokra ( make up) ateter süoshi tasen ka sobura ashishir ni koda malir ozü kibong tia songtokra mangtsüngsong koktenra leptsüngmeki. La O angadanger courti balatsü obendang agüja ashi, kidangji tebuttsü O tanur alitsü tebuba tetsü den oa tetsür kidang alitsü.

Tetsür aika temulung tulu tanü asüng ya balaka tebuba den temeimtsü tanur pezü pungo yutsür tangar den apteper jena aoba angur. Teburibo balayonga tebuttsüji tali mesenmoto masür. Saka tetsüribo metzü metsülokja sempar.Tetsür dak temeim mali. Lady Diana otsü alimai metsüngareta jembir. Saka lai balai aodang chuba kidang takaba ajak okshia bener ayazük Lady Diana divorce left prince Penniless, Princess Diana took away ever Penny she had in July 1994 Divorce .Onok town nung balar kibong ka kinungtsüi window Burda aser kioktsü dena bener aoba liasü.Ano Tuli lena medemer kati ashiba tetsürlai chipo tapok aser pongalashi mesetba dena kenshia bushia bener aoba otsü angashiogo. Shakespeare-i tetsür dak tashi mait lir ta ashibaji itemji lir.Anungji Leo Tolstoy-i ni asüdang kheni kü kinungtsü ni anasa tarudaksü ta ashi südi ta bilemer.

Kechiyong pai yamaji ashi.India tsür politician ta jembirtemji reprangdangra tera matamabensa shisatsü lir tesa. Lt.Sushma Swaraj ,Lt.Jayalalita Uma Bharti, Mayawati, Mamata Benerjee, Manipur tsür Sharmila Tagore shiba küm aika Manipur nungi Armed Force Act agientsü lumi lai political party ka tenteter parnok tetsür asem Electioni ai.Saka par aseme votes 696 angu laia voted 90 dang ngutet.Tetsür dak tashi mait lir.Aser sangkeni pei nung memetet ama aikati aji memetet.

Tanü alima teraksa putu ta ajaba nung ya tetsür meteniang meraksar. Zambia lima nungbo tetsürtemi tebur rape asür teburtem timtemdaksür. Anungji Young women Christian Association (YWCA) (Male rape Victims Sextual abuse of men by women) teloki linük temzüng yanglushitsü akanger. Nübur rongsen mapayuba corruption India President .Pratibha Patil La küm 5 inyakdang aeni aoba foreign trip nung sen crore 205 entok.Tesüsaba South Africa aser Seyehelles anogo 29th April 2012 semdangba kija nung sen 18.08 crore entok.Tetsürtemi rakzükraktemba Delhi nung M.P K.C.Patil tetsür kati 28-04-2017 lar kidang aniketer yi jemdakja mapa tamajung inyaker mangsa noksa tapu tapu tangoker sen crore 5 tangsa magütsüra tepsettsü ta auer9 gang) telok hire süa yur merenshiba tatalokba jembir.North korea president tebu tambur chir Kim Jong Nam Malaysia Kualampur Airport nung tetsür anati mim mozü tejak nung menokja tepsetba alima nübur aoksar .Joko tebur tepsettsü tetsür hire süteper Tamil tsür tanur kati Rajiv poksetba ajia hire system tetsüri amshiba lir.Ano tetsüri tebur hire amshiba Madhya Pradesh nung tebuba Prasad Shivasi tepsettsü tebuttsü Lashmi Shivashi tesayur kati lar student asem hire süa tepsetba otsü jembir.Tetsür tebur ajak hire amshiba.

*(Maneni asüng adok nung...)*

**Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger angateta agitsü mepishir**

## Chuchuyimpang Baptist Arogo nung Tebenjem Lanur shisatokden aka



June 20, 2023 nü Chuchuyimpang Baptist Arogo Youth Ministry nung "Tebnjem Lanur" shisatokden sentong agiba sülen tangokba noksa nung angur.

**Mokokchung, Aami/June 20 (TYO):** Chuchuyimpang Baptist Arogo Youth Ministry nung "Tebnjem Lanur" arrshi kum 18 nungi 24 tsüingdapurtem asoshi shisatokden ka loktiliba nung ketdangsüba aser lenisüba dak rangloker kaogo.

Mongolbarnü iba sentong nung Ao Baptist Arogo Mungdang Youth Co-ordinator Wb.Teka Imchen ajanga Lai O tarok tesayuba nung

amendaker arrshi kum 18 nungi 24 tashipur nem tain küma lokti balala nung atongsema aodang tamanger ka ama Tsüingrem angateta pei tashi-i akokba nung ketdangsüba aser lenisüba nung alitsü, ta asüba tsütsülen shisa tesayuba agutsü.

ABAM kübok Youth Ministry nung Tebenjem Lanur mapatong tenzüker külen Wb.Teka Imchen arrshi kum 18 nungi 24 asoshi sayubentsü agütsüba shisadokden akaba ya

Ao Arogo nung mezüingbuba lir aser iba ya ajanga Ao Khristan lanurtem Tsüingrem dangi anasatiba aoba mapang ka asütsü, ta pai metetdaksü.

Iba sentong nung lanur 40 dak tema adenshia iba sentong nung kanga dang temoatsü nguogo, anungji lanurtem aser Shisa Tuyur Wb.Teka Imchen dang pelaba Chuchuyimpang Baptist Arogo Asso. Pastor, Tensasanger Supong ajanga metetdaksü.

## Khristan telok balalai alima nung refugees tebilemtesü lemsatop



June 20, 2023 nü Fort Wayne, Indiana (US) nung Khristantem downtown library nung adenshia World Refugee Day amongdang tangokba noksa nung angur. Iba anogomong sentong ya Fort Wayne-South Bend nung Arogoi Allen County Public Library den longjemer ayongzük.

**June 21, 2023:** World Refugee Day anogomong nung Khristan telok balalai alima tesem balala nung rara ajanga nisung aikati pei ki toktsür ajentsüsa akümba ajanga refugees kanga teimba akümba tebilemtesü lemsatop.

United Nations High Commissioner for Refugees-i ashiba agi, 2021 kum tatembanglen tashi nung alima nung refugees million 89.3 liasü, 2022 kum tomnen tashi nungbo refugees million 103 akum aser 2022 kum tatembanglen tashi nungbo refugees million 108.4 kumogo.

2011 kum nungbo alima nung refugees million 38.54 dang liasü. Tang tesüsa alima nung ano refugees aika bendenlokbaji Sudan aser Ukraine na nung rara ajanga lir. Iba dak alia alima tesem balala nung yimsü nung ajemdaker reshikangshiba, alima tzu-mopung lendong balala aser meimchir temeden anema inyakba kanga bulua kumogo, aser item kuli balala ajanga nisung aikati pei lima toktsür jena refugees tali bendenloker, ta Khristan teloktemi metetdaksü.

Alima nung refugees yariba Arogotem rongnung America nung aliba Evangelical Lutheran

Church densema lir.

US-i America nung refugees 125,000 tashi jenokdaksütsü telemtetba agia liasü, ajisüaka yakum US-i refugees 25,465 dang jenokdaksü, ta Evangelical Lutheran Church of America (ELCA)-i metetdaksü.

Adventist Development & Relief Agency International Tir, Michael Kruger-i, taoba hopta parnoki World Refugee Sabbath ayongzuka mongogo, ta metetdaksü.

Kruger-i, "World Refugee Day anogomong amongba ajanga, alima nung refugees million aika tebilemtesü anendaksütsü aser jenokdaksütsü atema asenok ajaki longjemer inyaksü nungdak, ta nenshia metetdaksü," ta metetdaksü.

US nungsa tanga organizations balalai refugees tebilemtesü lemsatoper aser refugees-i ajangshiba timtem balala otsü lemsatoper.

State Department kübok Evangelical humanitarian organization World Relief-i, refugee Milan-i pa arrshi kum 16 asüdang Burma nung par ki toktsür ajenba ostü lemsatopba metetdaksü.

Pa kum 15 tashi Malaysia nung aliba sülen tawa tuang pa aser par kibong South Carolina nung jenokdaksütsü atema shima liasü.

Milan-i, "Ni Laishiba nung Yoseph aser Daniel nung otüsü azüingba ajanga parnoki mapang ajak nung Tsüingrem den ochishia aliba metet, saka parnokia takum nung timtem ajurua liasü. Ajisüaka parnoki timtem ajak koktet, kechiyong Tsüingremji ajak takoksang lir," ta ashi.

June 20, 2023 nü Fort Wayne, Indiana (US) nunga Khristantem downtown library nung adenshia World Refugee Day mongogo. Iba anogomong sentong ya Fort Wayne-South Bend nung Arogoi Allen County Public Library den longjemer ayongzük. Iba sentong nungji Ukraine nungi refugees densema linük balala nungi ajenba refugee temi parnoki ajangshiba otsü balala lemsatopba liasü.

2021 kum Fort Wayne-South Bend Arogoi yaria Afghanistan nungi refugees 75 jenokdakja liasü aser parnok rongnung 60 nembo Fort Wayne nung ki agüja teti atema jenokdaksüogo.

## ANO GO ABEN TSÜNGREM DEN

### Shidakba Shisatsü

#### T. Ken 111: 1 - 10

Asenok temetetba tulu aliba saka shisatsü tulu makaba lima ka nung alir. Temetetba alidakji tamashi mapaa inyaker. Tenüngsang ken 111 nung Dawidi asenok dang meyima aliba shisatsü aser temetetba indang ashir. "Kibuba tsüububaji shisatsü tetenzük lir; ya shirnoki inyaker parnok ajak tangatetba tajung lir" (t. 10). Idaki asenok asoshi shisatsü asem meyima aliba sayur, aser itemji angazüktsü asoshi universityi aotsümenüngdak.

Tsüingrem tsübuang. "Tsüingrem tsüububaji shisatsü tetenzük lir." Ibai alar kati master tsüububa ama masü, saka temeim tebu ka dang tanuri temeim agi akhüm tsübu sayuba lir-Tsüingrem ase Pa O tem akhüm tsüububa lir, Pa asenok den dena aliba aser asenok asoshi Pai mulungba akhüm tsüububa lir.

Pa dang tashi angaba. "Ya shirnoki inyaker parnok ajak tangatetba tajung lir." Tsüingrem O ji azüngtsü aser bushitsü atema dang magütsü saka iba nung asenoki tashi angatsü atema agütsü. Jembitsü aser zülutsü atema dang masü saka O ji inyaker akümtsü asoshi agütsü. Kodang asenoki Tsüingrem dang tashi angadir, asenoki kechi inyaker aji angatetter. Tashi angabaji Tanela süngjang rong nungka lir.

Pa tenüng asangba. Pa tenüngsang teti tatem maka." Tenüng asangbai pei atema dang alitsü bilemba shisatsü asenok nung agientsür. Iba yagi asenok süngyanglu nungi aser Tsüingrem melen tanga ayuba nungi piladaktsü. Asenoki koda ka Pa tsübur patakaji Pa dang tashi angaba alitsü. Itemji tepela aser takok anguba takum asütsü.

Alima shisatsütemji kimong tai nung yanger. Nai Tsüingrem tsübudang na shisatsü nung ainer. Shisatsü temerükji Tsüingrem tsüububa nungi tenzüker. Tanü nai Tsüingrem tsüububa shisatsü agi Pa den jajaang.

## USCIRF-i Biden dang Modi den Religious Freedom atema jembitsü mepishi

**Washington, June 20 (Agencies):** United States Commission on International Religious Freedom (USCIRF)-i US Tir, Joe Biden dang Brihostibarnü (June 22) Ato kilonser, Narendra Modi den senden amenba mapang nung India nung religious freedom atema süoka jembitsü mepishiogo, ta International Christian Concern (ICC)-i metetdaksü.

USCIRF Commissioner, David Curry-i, "Linük ana (India-US) tsüingda tesendaktep nung tamangba yimsü temeden tebilemtesü nüök süoka jembitsü atema Biden administration-i maongka angur. US sorkari India nung sorkari pei nüburtem anema religious freedom alema inyakbatem agizüktsüji kanga tongtibang aser sorkar dang meimchir temedentem kumzuka ayutsü atema ajungshitsüji tongtibang," ta metetdaksü.

2020 kum nungi tenzüka USCIRF-i US State Department dang India ya CPC (Countries of Particular Concern) nung züngoktsü benoker. Kum shia US Tiri

tamangba yimsü temeden anema inyakba linüktem CPCs nung züngoker.

CPC nung züngokba linüktemji US-i aitsür aser parnok anema tenokdangba balala benoker.

India nung yimsü nung ajemdaker nisung bendangshidanga züngshir aser Khristantem den tanga minorities anema state aika nung anti-conversion ozüingtem benoka lir.

India linük temzüng ajanga pei melungba yimsü amangtsü, bentshitsü aser tangar den-a lemsateptsü atema senso ajak nem temeden agüja lir, ajisüaka state aika nung sensotem Khristan yimsü dangi meyiptsü memelar.

2014 kum Modi leniba nung Centre nung BJP sorkar akümba mapang nungi tenzüka India nung Khristantem anema inyakba tatalokbatem kanga bulua kumogo, ta ICC-i metetdaksü.

2021 aser 2022 kum International Christian Concern (ICC) indang Persecutor of the Year annual report nung Modi, BJP aser RSS tetshia lir.

**AO OSHI ANGAZÜKDAK:**  
**TANÜ ANGAZÜKTSÜBA OJANG**



**Rasatep**

(adj) mepelatep adok, meputepi raratep (angry with each other)

\* Par kinungertem rongnung meputep adoka **rasatep**.

**Rasemnü**

(n) hapta nung anogo pezünübuba ( Wednesday)

\* Ao arogo ajak nung **rasemnü** aonung sentep alir.

**OLONG PAITEP # 6553**

1		2		3		4		5
			6		7			
8								
					9			
		10						
11								12
				13			14	
15								
16						17		

**TIPIEN**

- 1. Nüji masü - (4)
- 3. Techinütsüka - (6)
- 7. Aketa shirangba - (5)
- 8. Pi - (6)
- 9. Amena - (5)
- 10. Kinü - (5)
- 11. Tanang masü - (5)
- 13. Lenmang - (6)
- 15. Nübo tedi - (5)
- 16. Tuoshi - (6)
- 17. Shiruru apuba temenatsü - (4)

**LANGTSÜNGLEN**

- 1. Jila tulu - (5)
- 2. Sarasademdang tembang - (4)
- 4. Tarutsü indang ashirtem - (6)
- 5. Allia - (5)
- 6. Mojing - (5)
- 9. Tai inyakba metet - (5)
- 10. Medemer chijiba - (6)
- 11. Tatokba / Amadok - (5)
- 12. Anüngdang masü - (5)
- 14. Jabaso masü - (4)

**OLONG PAITEP # 6552 TELANGZÜBA**

**TIPIEN :**

- 1. Tesangra, 5. Mungo,
- 7. Kisen, 8. Salem, 12. Semki,
- 14. Kilem, 15. Kensü,
- 16. Sangpang.

**LANGTSÜNGLEN :**

- 1. Temesen, 2. Raksa, 3. Aon,
- 4. Aso, 6. Nile, 9. Alizüng,
- 10. Omen, 11. Lemta, 13. Ola,
- 14. Kin.



**SOBANGBA, ALOKBA DANGI**  
**MANGATETBA KAR ASÜNGDANGI AOR :**

- Sobangba** - Alok tanüa ne dangi mangatetba ka asungdangi arurako.
- Alokba** - Kechi mangatetaka, shiangma.
- Sobangba** - ANTA Office raksatsüa ta asüba ya kechiaka? Ya tsümar o agi entsü dang ANTA ajaba ya masü na?
- Alokba** - Arreyy na tang tashi ya memetet no! All Nagaland Taxi Association office raksatsüa ta ashirbaja.
- Sobangba** - Süra NSF office raksatsüa to na? Ano Nagaland nung office kwika raksatsü lir?
- Alokba** - Aya ya ano aika zünger mezüngma lirdi.
- Sobangba** - Iba ama mapa tamajung inyakertem ya public-i ola atoka aitsür maitsür ya?
- Alok** - Nabo paper ya mazünger no? Lokti tentet balala ajaki idakji teraksatsüra tenadang iba ama mapa tamajung inyakertem khukua aitsür ta paper nung agütsüba ya koda.
- Sobangba** - Süra iba mapa tamajung inyakba ya kechi koma ka asü nung, kechi mapa ka inyak nung action agitsü?
- Alokba** - Longkak ait nung dang action agitsü adi.
- Sobangba** - Oh Alokba!!

- Lilir - Asangla.

**Taoba Mizoram chief secretary Chuaungo-i Congress nung aden**



**Aizawl, June 21, 2023**

(Agencies): Taoba Mizoram chief secretary Lalnunmawia Chuaungo-i Bodbarñü Congress nung züngsem kümogo.

Mizoram nung assembly elections agitsü ita ishika lia Lalnunmawia Chuaungo-i Congress party nung denogo.

Züngsem 40 agi akümba Mizoram legislative assembly indang election taküm agitsü sentong lir.

Chuaungo dak alia Mizoram nung television presenter Vanneihthanga Vanchhawng aser senior journalist Lalremruata Renthlei nati Congress nung denogo.

Par aseme Congress nung adenba ajanga Mizoram assembly elections jakdang Congress tashi itshitsü ama repranger.

Tanü Aizawl nung sentong ka nung Chuaungo, Vanneihthanga aser Lalremruata nung dena

nisung 771 tashi Congress nung denogo.

Iba sentong nung Congress party president Lalsawta-i parnok aniok.

"Taruba assembly election nung onoki sen mamshitsü. Onok ket nung sen mali ajisüaka ozü candidate tem ochishir, temeshi aser temulung lemteterem asütsü. Onoki tulusang Tsüngrem dang nungi ketdangsubaren tajung meshitsü" ta Lalsawta-i tanü ashi.

Mizoram nung alirtem aser state ajungtsü atema pai politics nung shilem agir ta Chuaungo-i ashi.

Pa küm aika Mizoram toksür tangalen lia aru aser tanga state tem nung tajung aika nguogo ta paisa ashi.

"Linük kübok tangalen mapa tajung aika inyaker aser itemji Mizoram nunga inyaktettsü. Gujarat den medemdangra Mizoram nung ketdangsur tajung aika lir. Congress sorkar akümba sülen Mizoram nung tetangshi ketdangsur aika angutsü" ta Chuaungo-i ashi.

Chuaungo ya 1987 batch Gujarat cadre IAS ketdangsur lir aser October 2021 nung Mizoram chief secretary inyaka lia mapa nungi anisüngzük. Iba sülen pai chief information commissioner (CIC) inyaka aru

saka politics nung ajemoktsü atema pai iba mapa nungi sodi agiogo.

2018 state assembly election maparen nung Chuaungo-i teka ai ta taoba state Chief Electoral Officer (CEO) SB Shashank-i tai tongloktsüba sülen Election Commission of India (ECI)-i Chuaungo mapa nungi agiena liasü. Idangji pa ya Mizoram home department nung principal secretary inyaka liasü.

2018 election nung SB Shashank-i central armed police forces talila lemzüktsütsü asüngdang saka Chuaungo-i ibaji magizük.

Chuaungo-i Bru voters indang identification slips amshiba atema ashishitep ta SB Shashank-isa tai tongloktsü. Chuaungo mapa nungi anentsüba aser Shashank-i Bru nung pusemba ya state sorkar, political party aser civil society temi ashishitep.

Iba atema November 6 & 7, 2018 anogotem NGO Coordination Committee ajanga state ajungalen lungkak aitba sentong ka ayongzükua agia liasü aser iba jagi ECI-i Shashank agien.

February 2019 nung Chuaungo-i tanaben Mizoram nung Chief Secretary inyaksü meyipa arudang nisungtemi pa pelashishia agizük.

**Agartala nung 'Pakistani' telungpur züngsem ana apu**

**Agartala, June 21, 2023**

(Agencies): Agartala nung aliba Ashwini Market nung Tripura Police-i Pakistani telungpur telok den sendaktepa alir ta temulung meleme bilemba nisung ana apu.

Tena ya Yakub Yazdanbox aser Shahin Mandal na ta jangaogo.

Police-i tena ket nung Aadhaar cards, PAN cards aser mobile phones aika bena aliba apu.

Pakistani telungpur teloktem

indang noksa aser osangtem mobile phones ajanga anguba osangtem nisung balalai lemsatapa liasü.

Sub-Divisional Police Officer (SDPO) Asish Dasgupta aser Amtali police station Officer-in-Charge (OC) Nadugopal nati nisung ana dang asüngdangya südar.

Tena anema ken o ka benokogo aser bushisüngdang tenzükogo saka tenati

osangbener den kecha melemsatap.

Ashwini Market area nung alirtemi tebilemtsü abenba lemsatap aser parnok ya Pakistani telungpur teloktem atema itdangitrar ama aru asütsü akok ta temulung malemer.

Tanü apuba nisung ana ya Brihostibarnü West Tripura District and Sessions Judge tsüngdangi anir aotsü ta police-i ashi.

**Meghalaya nung load-shedding maneni alitsü: CM Conrad**

**Shillong, June 21, 2023**

(Agencies): Meghalaya nung tzüngluruwa aruaka mapang tatsüka atema load-shedding alitsü ta Chief Minister Conrad Sangma-i ashi.

Power supply ya tzünglu aruba ajanga dang angur ta mebilemtsüla aser iba mapang kanga kümdanga

atsüksüla ta CM Conrad-i ashi.

Tzünglu aruba ajanga power tensa tajungba kümogo saka iba kija agi power supply tayongzükbatem mekoktettsü, ta paisa ashi.

Meghalaya state putiotsü nung tang mezüng atema Garo Hills nung Ganol, Jaintia Hills

nung Leshka aser Khasi Hills nung Umiam ajanga power supply agütsür, ta CM Conrad-isa metetdaksü.

Item tesem asem nungi power generation tasen anguba ya Meghalaya state atema otsüsütsü mapa ka lir, ta paisa ashi.



Mizoram CM Zoramthanga-i mozü kidang routine medical check-up atema pa tarensen ataa amenba noksa ka social media nung prokshiba angur. Ebenezer Hospital Radiology Department-i iba osang ya parnok social media nung sangokja liasü. CM Zoramthanga-i VIP protocol mamshi aser tangar ama dang booking asü ta parnok ashi. (Aizawl, June 21)

GOVERNMENT OF NAGALAND  
DIRECTORATE OF ART AND CULTURE  
NAGALAND ; KOHIMA

No. AC/PC/3/2020-21

Dated Kohima, the 19th June 2023.

**NOTIFICATION**

In pursuance of the Department's Advertisement NO.AC/PC/3/2020-21 Dated 27th April, 2023 pertaining to "Online Folk Song Competition" under the Banner 'AZADI KA AMRIT MAHOTSAV' with the Theme: 'Unity through Folk-Song' held on 24-05-2023, the Department is pleased to declare the following groups as the winners:

- 1st Prize : AHEO SUTSA, Thahekhu Village Block-7
- 2nd Prize : ELIXIR BAND WOKHA VILLAGE, Wokha Village
- 3rd Prize : TRONGTSA CULTURAL SOCIETY, YAKOR, B.P.O, Sangphur

Sd/- ADELA MOA  
Director, Art and Culture,  
Nagaland : Kohima

GOVERNMENT OF NAGALAND  
DIRECTORATE OF EMPLOYMENT, SKILL DEVELOPMENT & ENTREPRENEURSHIP  
NAGALAND, KOHIMA

**NOTIFICATION**

Dated Kohima, the June 2023

NO.DET-7/20/2001 (Vol-VII)/ It is hereby informed that Trade Test Exam (Supplementary) under SCVT will be held in the month of July / August, 2023. In this regard, Trainees (repeater) who are ready to appear the exam are hereby informed to fill up the examination form on or before the 30th of June 2023 in their respective Govt. Industrial Training Institute (Govt.ITI).

Sd/-  
KOVI MEYASE (NCS)  
Additional Secretary  
& Ex-Officio Director (HoD)

DEPARTMENT OF  
SOCIAL JUSTICE AND EMPOWERMENT

District De-Addiction Centres amenoktsü/ketdangsütsü  
atema Expression of Interest-cum-proposal meshir

National Action Plan for Drug Demand Reduction (NAPDDR) scheme kübok District De-Addiction Centres amenoktsü/ketdangsütsü atema temsüa aliba lokti tentet nungi Expression of Interest-cum-proposal meshir.

Temsüa aliba lokti tentet temi pei District Collectors den tesendaktep nung linük nung aliba 381 GAP Districts nung District De-Addiction Centres (DDACs) amenoktsüla/ketdangsütsüla. Temsüa aliba NGO temi DDAC atema apply asütsü akok, saka parnok ket nung NAPDDR scheme indang guideline nung shia aliba ama DDAC amenoktsü atema tesem angati asütsüla. Item district 381 nungi district 12 nung pei District Administration ajanga taa magiba ki agütsütsü. (Item district 12 ya : 1. Arunachal Pradesh kübok Changlang aser Lohit districts. 2. Jamnagar, Gujarat. 3. Jharkhand kübok Chatra aser Gumla districts. 4. Mallapuram, Kerala. 5. Jammu & Kashmir kübok Poonch, Kathua aser Shopian districts. 6. Wokha, Nagaland. 7. South Tripura district, Tripura. 8. Almora, Uttrakhand).

Jangra aliba lokti tentet temi elegibility conditions, role of DDAC, financial norms, selection procedure aser danga district/space amala indang metettsü asoshi Ministry of Social Justice and Empowerment indang website ([www.socialjustice.nic.in](http://www.socialjustice.nic.in)) aser e-Anudaan (<https://grants-msje.gov.in/ngo-login>) nung angutsü. Proposals ya Ministry indang e-Anudaan portal nung agütsütsüla. Proposal agütsütsü asoshi 19.07.2023 ya anogo tatemang asütsü.

e-Anudaan Portal :  
(<https://grants-msje.gov.in/ngo-login>)

cbc 38101/11/0005/2324

Ukraine nunger drone asem nokdangogo: Russia

Moscow, Aami/June 21 (Agencies): Russian air defences-i Bodhbarnü Moscow tesem nung drone asem nokdangogo, ta defence ministry-i ashi. Ministry-isa iba ya Ukraine nunger mapa lir ta ashi.

Ministry-i, Russian defences-i electronic jamming amshia drone tem mazüokteti kümdaktsü aser tasüba mesüra teraksatsüba kecha matalok, ta ashi.

Ukraine-i parnok arrtsü adena orr inyaksangshiba dak sendakba nung yimya agi kecha

telangzüba magütsür, saka Moscow densema Russia kübok tesem balala drone agi amakba tali küma odar. May ita drone ana Kremlin tonga ao aser drone kari yimti kübok tesem balala maka liasü.

Moscow regional governor Andrei Vorobyov-i Bodhbarnü ashiba agi, drone tem ya military warehouses kati oya aliba mapang nokdanga liasü.

TASS news agency sangdong ka ajanga ashiba agi, drone tem ya Kremlin nungi km 60 shi pilar aliba Russia Ground

Forces Taman Division dak rangloker yokba liasü.

Kasa mapang nung Russia-i atsünger aliba Crimea indang governor-i, Feodosia jila nung railway network raksatsüba indang metetdaksü, ajisüaka osang tejanga magütsü. Paisa, train senzusenpong nung tetsükdaktsü adokogo, ajisüaka takaratiba nung yanglushitsü ta ashi.

Russia-i Ukraine amak tenzüka sülen ita 16 tsüngda telok balalai Russia indang rail infrastructure tem maka arudar.

West Bank nung Palestine nungeri Israel nunger pezü khaset

Eli, Aami/June 21 (Agencies): Occupied West Bank nung nisung aliba tesem ka anasa teburchanu ka densema Israel nunger pezü khaset.

Mongulbarnü Eli tezülen restaurant aser petrol station nung Palestine nunger prangbong bena alir nisung anati injang khaloktsüdang ano nisung pezü yiru aser parnok rongnung nisung ka kanga sashia yirua lir.

Palestinian militant group Hamas ajanga lendong agütsür ya par telok züngsemtem lir ta ashi. Lendong agütsür nisung ana rongnung ka prangbong bena aliba civilian kati iba lendong atalokba tesem nung khaset aser ka ayuaba gari nung jena ao aser mapang tatsüka lir Tubas jila nung Israel sepaitemi tepset.

Tawa West Bank nung azüdokshia arubasülen iba lendong ya kiralongrar mapa aser lenmang ajak lapoka lir, ta Israel ato kilonseri ashi.

Hamas atema odongtar kati ashiba agi, Israel mitkar temi Hombarnü Jenin nung refugee aliba tesem ka amakdang Palestine nunger nisung tenet tepsetba atema telangzüba agüja iba lendong ya agütsü.

Mongulbarnü lendong ya Eli south tsütsü Highway 60 nung atalok, koba Palestine nunger Ramallah aser Nablus yimtittem tsüngta lenmang tongtipa lir.

Prangbong bena alir nisung

ana ya north tsütsü kilometre 10 shi pilar Urif yimtsüng nungi gari ka nung aru, ta Israel Defense Forces (IDF) odongtar Rear Admiral Daniel Hagari-i sangdong ka nung ashi.

Parnoki lenmang anasa aliba hummus restaurant ka nung injang khalokja civilian asem tepset aser iba sülen petrol station nung civilian ka khaset, ta pai ashi.

IDF sepaitem aser Shin Bet security service nungi officer temi mapang tatsüka lir north-east tsütsü kilometre 29 pilar Tubas anasa gari ya ngutet aser prangbong bena alir nisung tanabuba ya khaset.

Iba lendong nung asürtem ya Eli nungi arishi küm 18 tain Elisha Antman aser arishi küm 63 tain Ofer Fairman, Eli anüdoklen Ahiya settler outpost nungi arishi küm 17 taon Nachman Mordoff, Yad Binyamin jila nungi arishi küm 21 tain Harel Masoud ta jangjaogo.

Israel Ato Kilonser Benjamin Netanyahu-i sangdong ka nung, "Kü temolungjang taroktiba nungi asür kinungertem den asükhu lemsateper, Tsüngremi parnok mang ayangtsü, aser nübur ajunga tenüng nung yirur alirtem tekeratiba nung taneptsü angutsü sarasademtsür," ta ashi.

Hombarnü Israel sepaitemi Jenin nung refugee camp ka mita aodang Palestine nunger

Biden-i Xi Jinping dang 'dictator' aja, China mepelar

Washington, Aami/June 21 (Agencies): US aser China tesendaktep tajungba kumshitsü asoshi US Secretary of State, Antony Blinken-i Beijing semdang anogo ka sülen US Tir Joe Biden-i China Tir Xi Jinping ya dictator ama athishia jemi.

California north tsütsü Democratic Party fundraiser ka nung jembidang, China nunger balloon ka February ita United States anüng nun glia khazüka yokba atema Xi ain adok, ta Biden-i ashi. Washington-i iba balloon ya itdangitertsü atema amshi ta ashir.

"Gari ana sünga itdangiterba hadir bena aliba balloon ni khazüka yokdang Xi Jinping kanga jashiba ya danga kecha agia masü saka balloon yangji aliba pai memetetba ajanga lir," ta Biden-i ashi.

"Dictators atema ibaji maksü tulu lir. Kodang parnoki kechi atalokar memetet. Balloon ya pa aliba tesemi aotsüba masü liasü. Mazüokteti ao."

Iba balloon ya ajanga US-China tesendaktep mejungi aliba ano tali tamajungba kumdaktsü, koba pei sasa yimsü asüba Taiwan ken o nungi tenzüka semiconductors aser human rights mechi lir, aser iba balloon tatalokba sülen Secretary of State Antony Blinken-i Beijing semdangtsü aliba thinen.

Ajisüaka Blinken ya taoba

hopta tatemlen Beijing-i oa Foreign Minister Qing Gang, foreign affairs ketdangsür Wang Yi aser Hombar nikongdang Xi den ajurutepa jembishinüa liasü.

Tongtipang telemtetba magiaka Blinken aser Xi nati rara madoktsüsa Washington aser Beijing tsüngta mangatetep aliba angatetteptsü nüngdak ta agizüka liasü.

Biden-i iba sülen linük ana tsüngta tesendaktep lenmang shidak nung lir ta shiaka pai iba sentong nung jembizüka yokba ajanga tesendaktep asendenshir tamajungba akumtsü jenjang nung lir.

Biden-i iba o ashiba ya junga mebilemdangi tapi agi jemi, ta China-i ashi.

Bodhbarnü Foreign Ministry odongtar Mao Ning-i ashiba agi, Biden-i jembiba ya ochi anema lir aser diplomatic protocol nung kanga mejungi aibelener aser China indang 'political dignity' raksatsür.

"Ibai yimjak nung nüma tanga rara mesüba lir. China-i temolung masüba aser anema nokdakba lemsateper," ta Mao-i ashi.

Xi ya China tir ka ama kümsük asem buba inyaker aser Mao Zedong sülen China nung tashi taittiba lenirji Xi ya lir.

Arishi küm 80 tain Biden ya US tir kümsük tanabuba inyaktsü atema 2024 election nung tokteptsü.



June 21, 2023 : OceanGate Expeditions ajanga agütsüba noksa ka nung Titanic rong raksar aliba semdangtsü asoshi Titan nungja agütsür amshiba submersible vessel ka angur. Iba rong nung nisung pongu mener Titanic rong teraksa reprangtsü tzüyim telungi aludang North Atlantic nung sama aser linük balalai mapang arishia iba rong bushir.

## 1st Open Women Football League-cum-Knockout asayamung ayonger

**Dimapur, Aami/June 21** (TYO): Department of Youth Resources & Sports-i ayongzuka Ibuba Open Women Football League-cum-Knockout asayamung asayatsü.

Iba asayamung ya Indira Gandhi Stadium, Kohima nung June 26 nungi July 1 nü tashi asayatsü. Iba asayamung lapokba sentong nung Advisor, Industries & Commerce, Hekani Jakhalu alakteta jaoker

asütsü. Department-isa, iba asayamung nung shilem agitsü atema tejangrartem ajak jaokogo aser asayamung nung shilem agitsü atema taa kecha magitsü, ta metetdaksüogo.

## Venus Williams nem Wimbledon atema wildcard agütsü



**Aami/June 21, 2023** (Agencies): Arishi kum 43 tain America tsür Venus Williams nem Bodhbarnü Wimbledon nung asayatsü atema wild-card entry agütsüba sülen la iba asayamung nung 24benbuba asayatsü lir.

Williams-i Wimbledon nung kija asaya ponguben koka lir aser 2017 kuma iba asayamung final tonga asayaogo. La kum 20 tejekdang iba asayamung

nung mezüngbuba asaya liasü. Williams ya tang world ranking nung jenjang 697buba nung lir aser lai Hombarnü Birmingham Classic nung 7-6 (5), 4-6, 7-6 (6) agi jenjang 48buba nung aliba asayar Camila Giorgi kokogo. Kum pezü tsüngda lai tang mezüngbuba top 50 nung aliba asayar ka kokogo.

Grand Slam tenet tashi koker aliba asayar ya taruba round

nung iba Wimbledon atema warm-up asayamung nung Jelena Ostapenko den asayatsü.

Williams' tenu Serena-ia Wimbledon tenetben koker lir. Serena Williams taoba kum iba asayamung nung mezüngbuba round nung tsük aser iba sülen asaya nungi anenba sangdonga liasü.

Ukraine tsür Elina Svitolina aser British tsür Heather Watson aser Katie Boulter nung nema iba asayamung atema wild cards agütsüogo. Tebur kija asaya nung Belgium nung asayar David Goffin, shibai 2019 aser 2022 kum iba asayamung quarterfinals tonga asayaogo, pa nema wild cards agütsüogo.

Wimbledon ya July 3 nü tenzüksü.

## Taipei Open 2023: Prannoy, Kashyap pre-quarterfinals-i iogo



**Aami/June 21, 2023** (Agencies): Tang asaya aliba Taipei Open nung India nung asayar HS Prannoy aser Parupalli Kashyap nati Bodhbarnü pei tata asaya straight-game nung koka pre-quarterfinals-i iogo.

Tebur kija asaya mezüngbuba round nung world number 9 asayar Prannoy-i 21-11 21-10 agi Taipei nung asayar Lin Yu-Hsien koka liasü. Pai iba asaya ya minute 26 nung ayong ayonga kokatok.

Third-seeded Prannoy, shibai taoba ita Malaysia Masters Super 300 title benogo, pa mezüngbuba round nung Chen Chi Ting aser Tommy Sugiarto na asayaba sülen

takoer den tanabuba round asayatsü.

Tebur kija asaya nungsa taoba mapang Commonwealth Games gold medallist Kashyap-ia 21-15 21-16 agi Germany nung asayar Samuel Hsiao kokogo. Pa pre-quarterfinals nung local asayar Su Li Yang den asayatsü.

Ajisüaka India nung aayartem rongnungi S Sankar Muthusamy Subramanian bo tsükatokogo. Pa Japan nung asayar Kanta Tsunayama-i tsükdakja liasü.

Subramanian-i mezüngbuba game nungbo terabo toktepa asaya ajisüaka tanabuba round nungbo kecha mesütet aser 13-21 5-21 agi asaya makok.

## Goalkeeper Vikram Singh Bengaluru FC-i alizükogo



**Aami/June 21, 2023** (Agencies): Indian Super League club Bengaluru FC-i kum ka atema goalkeeper Vikram Singh den tenangzüktepba yangluogo, ta club sangdong ka ajanga Bodhbarnü metetdaksü.

Vikram, shiba tesüsa I-League nung Aizawl FC nungi asayaogo, pa taruba season nung Bengaluru FC nungi

asayatsü. "Ni club tasen ka nung asayatsü atema yongya atar, kechiyong iba ajanga goalkeeper ka ama ni renlokyonga aoba nung teyari agütsütsü ta amanger. Ni teammate aser coach tasen aser fan tem den ajuruteptsü yonga atar," ta tenangzüktepba yangluba sülen Vikram-i ashi. Mumbai nung soa ainsang

Vikram ya Mumbai City FC Academy nungi anitetba asayar ka lir aser pa taoba mapang Fateh Hyderabad FC nungi asayaogo. Pa 2020-21 kum Islanders'-i League title abenba squad nung densema liasü. 2022-23 kum Vikram Aizawl nungi 12 ben asayaogo. Parnok league nung tenetbuba nung tembanga liasü.

"Vikram-i Aizawl FC nungi asayaba mapang pa sempet sayuogo aser pa onok coach aser tanga keeper tem den inyaksangshiba ajanga temaba jenjangi atutsü atema teyari agütsütsü ta amanger.

"Pa dak goalkeeper tajung ka akümtsü atema sempet lir aser team nung pa züngoksemba ajanga onok tashi taitba kümdaktsütsü ta amanger," ta Bengaluru FC Director of Football, Darren Caldeira-i ashi.

## Kovacic alizüktsü atema Manchester City aser Chelsea na mulungtepogo



**Aami/June 21, 2023** (Agencies): Midfielder Mateo Kovacic pound million 30 agi alizüktsü atema Manchester City aser Chelsea na mulungtepogo, ta osang ajanga Bodhbarnü metetdaksü.

Arishi kum 29 tain Kovacic ya 2018 kum Real Madrid nungi loan nung arua Chelsea nung aden aser iba sülen teti atema tenangzüktepba yanglua liasü. Stamford Bridge nungi asayatsü atema kum ka danga anunga lir midfielder ya alizüktsü atema Manchester City tejangraba lir. Pa ya alizüktsü City pur atema iba transfer window nung pa ya mezüngbuba asayar aliba asütsü.

Kovacic adenba ajanga manager Pep Guardiola nem

midfield nung tanga option agütsütsü, kechiyong captain Ilkay Gundogan tia tang tashi mejangjai lir.

Gundogan den tenangzüktepba yanglur aliba ya iba ita tembangtsü aser Germany nung asayar yagi tang tashi tenangzüktepba tasen yanglushitsü atema agizüka mali.

Kovacic-i Real nungi asayaba mapang Champions League asemben kokogo aser Chelsea nungia khen kokogo aser manager Mauricio Pochettino-i team yanglushiba mapang pa London club ya toktsütsü akok.

Bodhbarnü France nung midfielder N'Golo Kante-ia Chelsea toktsüogo. Pa Saudi club Al Ittihad nung denogo.



Bengaluru nung SAFF Championship metenzük tsüngda osangbenertem den sensaksemba mapang Indian Football team head coach Igor Stimac, Nepal team head coach Vincenzo Alberto (tabelen) aser Kuwait team head coach Rui Bento (tachichi) nung tangokba noksa nung angur.

## BILEMDANGANG

"Shisabulu khuret ya meimchir sobutsü."